

TEZAUR LITURGIC
25 IANUARIE

SLUJBA
SF.CUVIOS
ANATOLIE I
ZERTALOV
DE LA OPTINA



MINEIUL PE IANUARIE
MOSCOVA



Месяца января в 25-й день

Преподобного Анатолия

Оптинского, Старшаго

На малой вечерни

На Господи, возвах: стихиры, глас 4:

От юности во страхе Божиим воспитанный,/ отче
Анатолие преподобне,/ всею душею Горняго возжелел
еси/ и, родители твоими на подвиг иноческий
благословенный,/ во обитель Оптинскую вселился
еси,/ в нейже, ревностно подвизаяся,/ велия
дарования от Господа приял еси/ и воистинну
зерцало благочестия явился еси./ Темже в
добродетели и нас укрепи/ и моли спастися душам
нашим.

Преподобным Макарием мудре наставляемь,/
богоизбранне отче Анатолие,/ душу твою, яко злато в
горниле, от страстей очистил еси/ и, добродетелей
иноческих высоту показуя,/ послушанием и
смирением украсился еси/ и, яко крин красный, в

Оптинстей пустыни процвел еси./ Темже со дерзновением к тебе вопием:/ дух покаяния нам испроси/ и не престай молиться о душах наших.

Послушание от старца Амвросия приемый,/ Шамординския обители насельницы духовно окормляти,/ блаженне отче Анатолие,/ мудрый наставник тем явился еси/ и, яко любящий отец, словом и житием назидая,/ неразумныя же девы от сна греховнаго пробуждая,/ кротце вся во Царствие Небесное управил еси./ Темже и нас на путь спасения настави/ и не престай молиться о душах наших.

Слава, глас 5:

Святителю Григорию Богослову подобяся,/ преподобне отче Анатолие,/ издетска добродетельное житие возлюбил еси/ и, словесы того паче, нежели брашном, насыщаяся,/ благочестие и чистоту восприял еси/ и, веру правую трубою покаяния воспроповедавав,/ в любви ко Пресвятой Троице возрасл еси,/ темже и преставления с ним во един день сподобися./ Ныне же, вкупе Престолу Божества Трисияннаго предстояще,/ молитесь о нас,

достоблаженнии отцы,/ память вашу любвию
почитающих,/ еже спастися душам нашим.

И ныне, Богородичен: В Чермнем мори:

На стиховне стихиры, глас 1.

Подобен: Небесных чинов:

Небеснаго града радование/ и обители
Введенския ликование,/ преподобне отче Анатолие,/
ныне к тебе в скорби прибегающих/ радости
духовныя исполни,/ яко теплый и дивный пред Богом
предстатель.

Стих: Честна пред Господем/ смерть преподобных
Его.

Любовию отеческою украшаемый,/ свет Христов
воистинну стяжал еси,/ отче Анатолие преблаженне,/
имже путь духовный освещая,/ души многия истинно
просветил еси./ Темже моли о спасении тя
почитающих.

Стих: Блажен муж, бояйся Господа,/ в заповедех
Его восхощет зело.

Трудолюбие и послушание являя,/ высоты
монашескаго жития достигл еси,/ отче богоприятне

Анатолие,/ темже чудный дар от Господа приял еси,/ словесы твоими скорбящих утешати/ и молиться о душах наших.

Слава, глас 6:

Днесь пустынь Оптинская/ цвет духовный нам приносит,/ иже в раи Богом насажденный,/ чистаго житием и подвигом високаго,/ преподобнаго старца нашего Анатолия,/ глубину смирения и мудрости сокровище.

И ныне, Богородичен: Творец и Избавитель мой,
Пречистая:

Тропарь зри на велицей вечерни.

На велицей вечерни

Блажен муж: 1-й антифон.

На Господи, возвах: стихиры, глас 4:

Трисолнечный свет в душу твою восприем/ и Божественными светлостями озарився,/ яко пресветлая звезда в Церкви Русской возсиял еси/ и, высочайший путь умнаго делания указуя,/ монашествующим светильник явился еси,/ отче наш

Анатолие,/ темже светло память твою празднующих/
изведи из темницы прегрешений.

Пламенное и чистое еже к Богу желание имел/ и
очи мысленная молитвою непрестанною твоею
просветив,/ богоносе отче Анатолие,/ полчища
демонская вспять обратил еси/ и ангельское житие на
земли явил еси./ Ныне же, Престолу Божию с лики
преподобных предстоя,/ поминай нас, чтущих святую
память твою,/ да обрящем милость в день праведного
воздаяния.

Ангельскаго жития взыскуя,/ ангельски на земли
пожил еси,/ темже и великий пастырь
Кронштадтский,/ у престола сослужаща посреде
ангел ты узре,/ ныне же престолу Владычню со ангелы
предстоя,/ молися о нас, отче Анатолие,/ память твою
святолепно совершающих,/ да молитвами твоими
райския жизни сподобимся.

Образе истиннаго послушания/ и старчества
светлое зеркало,/ молитвенниче Анатолие
преподобне,/ в сердце Всесвятое имя Иисусово
приим,/ вся страсти тернообразныя искоренил еси/

и, сладости молитвы насладився,/ всего себе в жилище Богу уготовал еси./ Егоже моли от тли и бед избавитися/ совершающим всечестную память твою.

Слава, глас 8:

Послушания ревнителю/ и смирения проповедниче,/ путь земный всечестно совершив,/ цветник Оптинский достойно украсил еси/ и, обильно благодать всем источаяй,/ сосуд Святаго Духа явился еси./ О, блаженне Анатолие,/ ныне на Небеси со святыми пребывая,/ не остави иже на земли к тебе прибегающих/ и святую память светло совершающих.

И ныне, Богородичен, глас тойже.

Вход. Прокимен дне. И чтения три преподобническая.

На литии стихира храма.

И преподобному стихире, глас 6:

Умною молитвою/ Триипостаснаго Бога воспел еси:/ Господа, яко Отца Безначальна,/ Иисуса, Собезначальное Слово Его,/ и Духа Святаго, жизни Подателя Милостива,/ Собезначальна и Сопрестольна

Отцу и Сыну,/ всем подающа грехов прощение,/ в
покаянии зовущим:/ Троице Святая, помилуй нас.

Трисолнечным Светом озарен,/ тремя великими
лучами добродетелей возсиял еси:/ смирением,
послушанием и молитвою непрестанною,/ и, теми
световодствуя,/ иночествующих сословия на стези
покаяния наставляял еси,/ темже ты, яко подвижника
всеизрядна,/ воспеваем, Анатолие преподобне,/
старцев Оптиных превеликая славо.

Глас 4:

Вся мира красная отвергл еси/ благаго ига
Христова ради/ и, верх добродетелей показуя,/
явился еси образ целомудрия и послушания,/
терпения, смирения и кротости,/ темже труды
многия и болезни,/ яко бремя легкое, нося,/
преподобне в обители Оптистей пожил еси,/ идеже и
покой души твоя в селениях вечных обрел еси./
Ныне же слышиши всех к тебе взывающих:/
преподобне отче наш Анатолие,/ не престай молиться
о душах наших.

Глас 5:

Всесветел ум и сердце чисто/ подвиги многими
стяжал еси,/ преподобне отче Анатолие,/ темже
монашествующим помощник изрядный,/ падшим во
грехи воздвижение скорое/ и сущим в немощи врач
изряден явился еси./ Мы же к тебе со умилением
зовем:/ молися Христу Богу,/ грехов оставление
даровати/ и душам нашим велию милость.

Слава, глас 6:

Труды и болезни жития монашескаго/
мужемудренно понесл еси,/ терпением и смирением/
страсти борющия умертвил еси/ и душею твоею
чистою, Анатолие преподобне,/ непорочно Христу
предстал еси,/ Егоже моли о спасении душ наших.

И ныне, Богородичен, глас тойже:

Цвет неувядаемый зрим Тя, Богородице,/ и
милости Чашу неисчерпаемую,/ нас бо ради от Тебе
родися Источник спасения/ и, явив Свое
человеколюбие,/ Тя Заступницу Усердную дарова
роду христианскому.

На стиховне стихиры, глас 5.

Подобен: Радуйся:

Радуйся, преподобне Анатолие,/ любви источниче
неисчерпаемый,/ Духа Святаго благодать из сердца
твоего источая,/ живительными словесы твоими
душы многия оросил еси/ и вертоград духовный Богу
неврежден соблюл еси,/ темже, райских садов
достигнув,/ назирай с любовью чада твоя/ и Христа
моли даровати нам мир и велию милость.

Стих: Честна пред Господом/ смерть преподобных
Его.

Радуйся, блаженне Анатолие,/ нищеты духовныя
рачителю,/ во вся дни живота твоего Господеви
усердно работая,/ душу твою святую Христу умно
сочетал еси/ и, яко птица света, во обители райския
вознесся еси,/ темже, память твою совершающе,/ во
умилении сердец наших со дерзновением зовем:/
испроси нам у Христа Бога мир и велию милость.

Стих: Блажен муж, бояйся Господа,/ в заповедех
Его восхощет зело.

Радуйся, богомудре Анатолие,/ преспеяния
духовнаго помощниче,/ к Богу горение в сердцах
юных любовью возжигая,/ отец чадолюбивый явился

еси/ и монашествующим верный наставник,/ темже,
целомудрия венцем от Господа достойно
увенчанный,/ вшел еси в чертог Небесный,/ идеже за
ны Христу Богу молися/ даровати нам мир и велию
милость.

Слава, гласъ 6:

Достойный подражателю старцев Оптиных,/
отче преподобне Анатолие,/ многоразличныя козни
бесовския отразив/ и гордыни ненавистную тьму
смирением одолев,/ истинный путевождь
безмолвствующим/ и молитвы умныя наставник
явился еси,/ темже и нас на стези спасительныя
настави,/ днесь в памяти твоей сошедшихся.

И ныне, Богородичен: Творец и Избавитель мой,
Пречистая:

Тропарь, глас 3:

Умныя молитвы пресветлый светильниче,/
Оптины пустыни дивная похвало,/ Церкви Русския
украшение,/ Небеснаго Иерусалима гражданине,/
отче Анатолие преподобне,/ моли Христа Бога/
спастися душам нашим.

На утрени

По 1-м стихословии седален, глас 8:

Единому Богу послужити восхотев, душу твою богомыслием питал еси и, в молитве уединенней, яко свеща горящая, пред Господом предстоя, образ чистаго и ангелоподобнаго жития монашествующим явил еси. Помози и нам, преподобне отче Анатолие, память твою творящим, чистоту помыслов стяжати и в душе молитвенном благоговейно пребывати.

Слава, и ныне, Богородичен:

Пресветлая палато Слова, Марие Дево Богоневестная, угасший светильник ума моего просвети Твоими молитвами, яко во мраце страстей заблужден есмь и в стране греха творю дела неподобная. Но всесильным Твоим предстательством облаки печали развей, да вижду ясно путь покаяния всесветел и радостию воспою Тя, Всенепорочная.

По 2-м стихословии седален, глас 3:

Пастырю от Бога благословенный, душ скорбящих врачевателю и заблуждших водителю, стадо твое богомудре упасл еси, словесы благоискусными

унывающих ободряя, дела же, яко светильник, сияя. Помози и нам, преподобне отче Анатолие, тесным евангельским путем твердо шествовати и Царствия Небеснаго достигнути.

Слава, и ныне, Богородичен:

О, Дево Пречистая Богородице! Таинство воплощения от Тебе Сына Божия несказанно и Рождество Твое нетленно, темже к Тебе, яко Матери Божией, притекаем и усердно молим: огради нас от бед и покрый честным Твоим омофором, молящи Сына Твоего, Христа Бога нашего, да спасет души наша.

По полиелеи седален, глас 4:

Днесь пустынь Оптинская на торжество верных созывает достойно прославить честнаго старца, егоже память с любовью прославляюще, сице вопием: радуйся, дивный пред Богом предстателю, преподобне отче наш Анатолие.

Слава, и ныне, Богородичен:

Радуйся, Радосте наша, Всепетая Богородице, Тобою всякия скорби избавляемся и радость спасения

обретаем: родила бо еси Единого Христа Бога и нас, земных, не оставляеши. Того со угодником Твоим преподобным Анатолием моли спастися душам нашим.

Степенна, 1-й антифон 4-го гласа. Прокимен, глас 4: Честна пред Господом/ смерть преподобных Его. Стих: Что воздам Господеву о всех, яже воздаде ми? Евангелие от Матфея, зачало 43.

По 50-м псалме стихира, глас 6:

Смиранный сердцем,/ любовью евангельскою возвышенный,/ духом крепок, яко адамант,/ нравом же кроткий,/ богомудрия кладязь живительный,/ душ скорбящих врачеватель искусный/ и жизни духовныя наставник мудрый,/ преподобне отче наш Анатолие,/ моли Христа Бога спасти души наша.

Канон преподобному, егоже краегранесие:
Анатолия пою, молитвы умныя светильника. Глас 3.

Песнь 1

Ирмос: Дивно, славно творяи чудеса/ Ты еси, Боже,/ бездну оземленивый, и колесницы

потопивый,/ и люди спасый, поюция Тебе,/ яко Царю нашему и Богу.

Припев: Преподобне отче наш Анатолие, моли Бога о нас.

Анатолие, отче предивне, память твоя светоносная небо церковное озари, всех любящих тя привлекаючи, темже во страсе священнем дерзаю воспети житие твое.

Настави ны, заблуждшия умом, на стези спасительныя и возгрей в сердцах наших любовь к Сладчайшему Иисусу, еюже снедаемь сладце, сердцем таял еси, яко воск, во огни Божества.

Ангелов светлости подражая, невестественный огонь в сердце носил еси и, весь просвещься, страсти плотския испепелил еси, быстрокрылым хотением волю отчую исполнив.

Богородичен: Тя Честнейшую Херувим и Славнейшую без сравнения Серафим, воспеваем, Всепетая Дево, Бога бо плотию родила еси, Всенепорочная, Единого от Троицы, Христа Жизнодавца.

Ин канон преподобному, глас 4.

Песнь 1

Ирмос: Моря Чермную пучину/ невлажными
стопами/ древний пешешествовав, Израиль,/
крестообразныма Моисеовыма рукама/ Амаликову
силу в пустыни победил есть.

Господи, благослови ны, достойно песнь воспети и
хвалу воздати паче всего земнаго Тя возлюбившему и
Тя единого всем сердцем возжелавшему,
преподобному отцу нашему Анатолию.

Издетска в вере воспитанный, любовь к
монашескому житию имел еси, Анатолие, и, Божиим
промыслом водимый, пустыни Оптинския достигл
еси, идеже свято подвизаяся, во град Небесный
пришел еси.

Тяготы и скорби жития пустынного смиренно
понесл еси, терпением душу твою укрепляя, Анатолие,
и послушания явил еси образ, змия древняго
коварство воистинну посрамив.

Богородичен: Моря житейскаго пучину Тобою
хранимому роду христианскому неврежденно

преплыти помози, Богородице, от силы вражия
рукама Твоима нас ограждаючи, имаже Сына Твоего
и Бога носила еси.

Песнь 3

Ирмос: *Лук сокрушил еси вражий/ и щиты стерл
еси крепостию, Владыко Христе,/ утверждение
наше,/ Свят еси, Господи.*

Оптинская похвала еси, Анатолие, и
монашествующих добрый воин Христов, восприим бо
щит послушания, постничества шлем и молитвы
обоюдоострый мечь, на путь спасения многия иноки
наставил еси.

Лук вражий сокрушил еси, отче премудре, и,
крыле молитвы посребрене имея, в Горняя умно
воспарил еси, сердце же чисто, яко златом блещуще
стяжав, лицом к лицу Бога узрел еси, вопия: Свят еси,
Господи.

Иисуса, Царя Славы и Господа, возлюбив, полки
бесовския Именем Того вспять обратил еси, отче, не
Голиафа бо меч прием, но камень словесный, и
исполины страстей тем сокрушил еси.

Богородичен: Яко златая Кадильница сущи,
Пречистая Дево, Божественный фимиам источающая,
смрада греховнаго верныя рабы Твоя избави, Ты бо
еси Заступница рода христианскаго.

ИѦ

Ирмос: *Веселится о Тебе Церковь Твоя, Христе,
зовущи:/ Ты моя крепость, Господи,/ и прибежище, и
утверждение.*

Телесныя недуги безропотно терпя, благодарение
Богу за вся приносил еси, блаженне Анатолие, чада
твоя сему научая.

На всяком месте хвалу Господу воздавая, сердце
твое храм Святому Духу содеял еси, преподобне
блаженне отче.

Молитву непрестанно совершая и Имя
Божественное Сладчайшаго Иисуса призывая, сердце
твое чисто соделал еси, богомудре отче.

Богородичен: О Тебе вси православнии людие
радуются, Пречистая Богородице, вопиюще:
благословенна Ты в женах, Всенепорочная
Владычице.

Ин кондак, глас 4:

Полезная души твоей взыскуп, во одежду иночества облекся еси, кротости же и смирению Господню подражая, Небесным жителем уподобился еси и, добрый наставник иноком быв, благочестия велий поборник явился еси, преподобне отче наш Анатолие, моли Христа Бога спастися душам нашим.

Седален, глас 4:

Добрый пастырю стада словеснаго, святе Анатолие, души немощныя словесы твоими и делом исцелял еси и, инокини многия отеческою любовию назидавая, неврежденны от соблазнов мира сохранил еси, и достойны Жениху Христу привел еси. Егоже моли и нам Царствия Небеснаго сподобитися.

Слава, и ныне, Богородичен:

К Тебе, Богородице Пречистая, в скорбех и нуждах суще, прибегаем, недостойнии, Ты бо едина скорая Молитвенница у Престола Сына Твоего и твердое наше Упование. О, Всепетая Мати, Твоим ходатайством заступи и спаси нас, да не постыдимся во веки.

Песнь 4

Ирмос: *Что ужаслся еси, Аввакуме?/ Кому
зовеши и вопиеши:/ от юга приидет Бог?/ Слово
Плоть бысть и вселися в ны, и видехом,/ во хвалении
поюще дивному Богу нашему,/ яко прославися.*

Поем и славим Твое спасительное смотрение,
Господи, яко явил еси Церкви Русской избранника
Твоего, преподобного Анатолия, Оптины пустыни
предивное украшение, благодати исполнена и
молитвенника теплаго о душах наших.

О, дивнаго Божия смотра, дарова бо Господь
тебе, преподобне Анатолие, дар умныя сердечныя
молитвы, еюже очи мысленная просветив, духовнаго
совершенства достигл еси. Не остави и нас твоим
молитвенным заступлением.

Юношеския нравы отринув, вседушно Богови
поработал еси, отче Анатолие, темже Той прослави тя
и, в Небесныя обители вселив, лику преподобных
сочета.

Богородичен: Марие, Богорадованная
Отроковице, Гору Тя зрит пророк Приосененную, и

ужасается: Всевышний бо, вселься в Тя, сниде к нам, яко потоки югом и исполни землю Боговедения.

И^н

Ирмос: *Вознесена Тя видевши церковь на Кресте,/ Солнце Праведное,/ ста в чине своем,/ достойно зывающи:/ слава силе Твоей, Господи.*

Преемник старцев велиих и ученик достойный богомудрых и славных Макария и Амвросия показался еси, преподобне Анатолие досточудне.

Духом пламенея, дары духовными душу богато возрастил еси, богомудре Анатолие, и верный ученик Господа твоего явился еси.

Нивы духовныя сеятель прилежный был еси, отче Анатолие, и, плевелы греховныя премудре исторгая, делатель искусный показался еси.

Богородичен: Пресвятая Богородице Дево, превознесенну и преукрашенну зрит тя Церковь Божия, достойно зывающи: Ты еси Мати Господа и Спаса нашего.

Песнь 5

Ирмос: *Светом Твоим Невечерним, Христе,/ озари, Боже, смиренную мою душу/ и настави на страх Твой,/ зане свет повеления Твоя.*

Отеческия заветы храня и послушание доброразсудное имея, ключарь таинственный явился еси, преподобне, и, ключем молитвы умныя двери страстей затворив, Небеса отверзл еси. Темже и нас в Горняя тайноводствуй, досточудне.

Ластовице богогласная и Предтечев рачителю, отче Анатолие старче наш, ты, в сердце Имя Господа Иисуса имея, весну умную в скит принесл еси и многия души, мразом греха окованныя, теплотою любви согрел еси.

Истинный послушник старца Амвросия быв, окормление сестер Шамординския обители приял еси, богомудре, и, духовне тех назидая и страху Божию научая, в Горняя обители мудре управил еси.

Богородичен: Тя, Пресвятая Дево, Богородицу воистину исповедуем, зане Тобою Свет явился в мир, и сущия во тьме греховней просвети.

ИѢ

Ирмос: Ты, Господи, мой Свет,/ в мир пришел еси,/ Свет Святый, обращающий из мрачна неведения/ верою воспевающая Тя.

Богомыслием просвещенный и в послушании отцу духовному прилежавый, от Господа на враги невидимыя силою молитвы одоление приял еси, отче преподобне.

Заповеди Христовы усердно исполняя и любовь твою всех благочестно согревая, попечения о себе никакоже имел еси, святе Анатолие.

Божественным Светом лице твое озаряшеся, преподобне отче Анатолие, егда таинство Святыя Евхаристии благолепно совершал еси.

Богородичен: Ты, Пречистая Дево, Свет Невечерний миру явила еси, из тьмы греховныя изводящий верою Тя воспевающих.

Песнь 6

Ирмос: Возвах воздыхании немолчными к Щедрому Богу,/ и услыша мя от ада преисподняго,/ и возведе от тли живот мой.

Воздыханьми немолчными и слезами,
всенощными стояньми и молитвенными бдении
невидимыя враги от стада твоего отгнал еси,
преподобне.

Имя сладчайшее Иисусово по вся дни
непрестанно в сердце твоём носил еси, Анатолие
славне, сего ради и множество иноков и инокинь
научил еси, како молитве сей подобает прилежати.

Украсился еси божественными добротами и
венцем победным увязлся еси, Анатолие отче, темже и
царствуеши над враги и Царю мира и Спасу душ
наших предстоиши.

Богородичен: Марие Дево Владычице,
Невместимаго Бога во чреве Твоём вместившая,
сердца наша расшири, еже искренне любить Бога и
ближняго по заповеди Сына Твоего.

Ин

Ирмос: *Пожру Ти со гласом хваления, Господи,/*
Церковь вопиет Ти,/ от бесовския крове очищися/
ради милости от ребр Твоих/ истекшею Кровию.

Истинный делателю молитвы Иисусовы сый, отче преподобне, ею и чад твоих мудре научал еси, о чистоте сердечней тех радея, да сладость духовную обрящут.

Помыслов откровению пред отцем духовным чад твоих поучал еси, святе Анатолие, во еже сетей бесовских избежать и Самаго Господа в себе прияти сподобитися.

Воина Христова воистинну яви тя Господь верным, Анатолие, о спасении всякия души присно ратующаго, темже и нас от наветов вражиих защити.

Богородичен: Песнь Ти слезную приносим, Дево, и сице вопием: избави ны всякия беды и милость Божественнаго Сына Твоего нам испроси.

Кондак, глас 2. Подобен: Вышних ища:

Богодарованною ти молитвою / возсиял еси, яко божественное светило, / посреде собора Оптинских отцев, / просветив монашествующих лики и наставив, / еже вопити непрестанно сердцем и усты: / Господи, Иисусе Христе, Сыне Божий, помилуй нас.

Икос:

Приидите, вси вернии, ратоборцы умныя брани, победника дивнаго Анатолия воспоим, иже злобу воздушных князей, яко прах, возмета и к Небесем взыде лестницею молитвы непрестанныя, к Вышнему Иерусалиму выну устремляясь и смирением страсти посекая. Темже от Венцедавца Христа, яко царским венцем, обложен, возглави монашествующих лики и настави, еже вопити непрестанно сердцем и усты: Господи, Иисусе Христе, Сыне Божий, помилуй нас.

Песнь 7

Ирмос: *Якоже древле/ благочестивыя три отроки оросил еси в пламени халдейстем,/ светлым Божества огнем и нас озари,/ благословен еси, взывающия,/ Боже отец наших.*

Небесная возлюбил еси, отче, вся земная презрев, и, от аввы Макария криле молитвы восприим, на высоту добродетелей, яко орел высокопарный, возлетел еси, благословен еси, вопия, Боже, отец наших.

Истинным Светом просвещен, монашествующим правило вернейшее и образ молитвы был еси, преподобне отче, темже и беседа твоя улади святителя Игнатия богомудраго, о непрестанней молитве вопросившаго.

Якоже древнии отцы, всепослушав духовным наставником твоим явился еси, блаженне Анатолие, темже и смиренномудрие неложное стяжал еси, начальниче мудрый и учениче смиренный аввы Амвросия.

Богородичен: Совет превечный Тобою, Дево, исполнися, глас бо архангелов услышавши, Слово Отчее во утробу прияла еси и Безлетнаго Сына, Всенепорочная, родила еси на спасение нас поющих: благословен Плод чрева Твоего, Богородице.

Ин

Ирмос: *В пещи Авраамстии отроцы персидстей,/ любовью благочестия паче,/ нежели пламенем, опаляеми, взываху:/ благословен еси в храме славы Твоея, Господи.*

Житие твое, труды духовными преисполненное, почитающе, отче, и писании твоими на полезное наставляеми, благодарне Богу взываем: благословен еси в храме славы Твоея, Господи.

Ангел во плоти на земли показался еси, отче, наставлении твоими, яко крылами, от козней вражиих ограждая и огнем любви твоея душевредная терния пополая.

Тело твое, яко храмину души, целомудрием украшая, к чистоте душевной и телесной чад твоих подвизал еси, Анатолие преподобне, темже моли Бога и нам от всякия скверны очиститися.

Богородичен: Тебе, Дево Чистая, Купино Неопалимая, Огнь Божества во чреве Твоем носившая и неопальна пребывшая, вопием: благословенна Ты в женах, Всенепорочная Владычице.

Песнь 8

Ирмос: *Образно во ангельстем явльшася зраце/ и дети прохладша посреде горяция пеци,/ благословите, дела Господня, Господа.*

Величие дел твоих исповедует Русская земля и ангельский собор воспевает твое им сопряжение, темже и наше хваление приими, Анатолие досточестне, вопиющих: благословите, дела Господня, Господа.

Егда с Кронштадтским пастырем безкровную жертву приносил еси, отче Анатолие, тогда ангели сослужиша вам со страхом и трепетом, воспевающе и глаголюще: благословите, дела Господня, Господа.

Троичным составом благоугождая Пресвятей Троице, ум и сердце во едино сочетал еси и тело деланием заповедей предочистил еси, блаженне, непрестанно взывая: благословите, дела Господня, Господа.

Богородичен: Из сетей вражиих душу мою исторгни, Всенепорочная Владычице, прилоги бо сладными люте оплетен, не могу чист предстати Престолу Владычню, токмо вопию: благословите, дела Господня, Господа, и Матерь Его в песнях величайте.

ИѢ

Ирмос: Руце распростер, Даниил/ львов зияния в
рове затче;/ огненную же силу угасиша,/ добродетелию
препоясавшеся,/ благочестия рачители, отроцы, взывающе:/ благословите, вся
дела Господня, Господа.

Наставления твоя, преподобне, мудрости
исполнена суть, имиже малодушнии укрепляются,
нерадивии исправляются и скорбящии утешаются,
благодарне взывающе: благословите, вся дела
Господня, Господа.

Сокровище богомудрыя души твоея источая,
сердцем о чадах твоих болезновал еси, отче Анатолие,
и, в терпении скорбей тех наставляя, тако увещевал
еси: благословите, вся дела Господня, Господа.

Словеса утешительная от любящаго сердца твоего,
отче Анатолие, яко миро благовонное, нам излишася,
мы же, о тебе Господа славяще, вопием: благословите,
вся дела Господня, Господа.

Богородичен: Руце Твои, Пречистая Богородице, к
Сыну Твоему простирающи, молитвы за ны Богу

возносиши, темже, Тобою спасаеми, сице вопием:
благословите, вся дела Господня, Господа.

Песнь 9

*Ирмос: Сладкою Пречистаго Твоего Рождества/
стрелою уязвлени, Чистая,/ Твоей достожеланней
доброте дивящися,/ песньми ангельскими достойно
Тя яко Матерь Божию величаем.*

Память твоя, отче Анатолие, плоды сладкия
приносит доброделания твоего, молитвою бо и
терпением душу твою очистил еси и прият ю Христос
во обители Своя. Темже песньми величающих твое
преставление, сподоби улучшить милость в День
судный.

Насажден в дому Божиим, преподобне Анатолие,
возрасл еси в скиту Оптинстем, яко кедр ливанский,
благовоние милосердия и любви приходящим к тебе
источая. Не забуди и нас, убогих чад твоих, верою и
любовию тя величающих.

Иисусовы молитвы делатель рачительный быв,
блаженне Анатолие, ум твой, яко владыку, на страсти
плотския мужески поставил еси и сердце твое

вселение Духу Святому соделал еси. Помози и нам страсти греховныя искоренити и непрестанною молитвою присно Богу угождати.

Красный и медоточный рай Оптину пустынь соделал еси, отче Анатолие, в нейже души всех приходящих к тебе духовными глаголы, яко медом, услаждал еси. Темже и нас, с любовью почитающих святую память твою, причастниками сладости райския быти сподоби.

Богородичен: Ангелов Сладость и апостолов Утешение, монашествующих Утверждение и православных Споборнице, не престай молиться к Сыну Твоему о исповедающих Тя, яко Матерь Божию и Деву Чистую.

ИѦ

Ирмос: Камень нерукосечный/ от несекомыя горы Тебе, Деве,/ краеугольный отсечеса, Христос,/ совокупивый разстоящая естества./ Тем, веселящися, Тя, Богородице, величаем.

Девства красоту на земли явив и душу твою постом и молитвою очистив, богоблаженне, во обители вечныя Господу себе уготовал еси.

Глаголы твоя спасительныя, яко бисер многоценный, в души верных влагал еси, преподобне отче Анатолие, темже и нас не остави, якоже обещался еси.

От мощей твоих благодать почерпающе, труды твоя и подвиги многия ублажаем, преподобне Анатолие, и за вся Бога нашего славим.

Богородичен: Из Тебе, Богородице, Источниче чистый, истече Вода Живая, Яже есть Христос Бог наш, глаголом жизни вечныя жаждущия напаяяй.

Светилен:

Житие твое, светом веры истинныя озаренное, праведно скончал еси, святе Анатолие, ныне, в сонме Оптинских старцев пребывая, яко звезда путеводная, к миру Горнему верным путь освещаеши.

Слава, ин светилен, глас 1:

Светильник света сый и умныя молитвы лампада негасимая, Анатолие старче Оптинский, елей духа

доброделанием души стяжав, темже вся
просвещаеши в памяти твоей и стезю спасительную
монашествующим и мирским указуеши.

И ныне, Богородичен:

Песнь Тебе достойно воспеваем, Дево Всепетая,
Богородице, Ты бо, от всех родов Богом избранная,
явилася еси, яко Заря Пресветлая от Неяже Солнце
Правды миру возсия и грешныя просвети.

На хвалитех стихиры, глас 8.

Подобен: О, преславнаго чудесе:

Богомудре отче Анатолие,/ ангелов небесных
радование/ и преподобных отцев похвало,/ огонь
молитвы непрестанныя стяжав,/ духовную сладость
вкусил еси/ и чистоту сердечную соблюл еси./ Темже
ныне тя сосуд избранный зрим/ и молитвенника
тепла Богу предлагаем,/ еже даровати нам велию
милость.

Блаженне отче Анатолие,/ смиренный и кроткий
подвижниче,/ зеркало послушания,/ заветы старцев
свято соблюдая,/ невидимаго врага победил еси/ и
ангельския высоты достигл еси./ Темже,

божественною благодатию облистаетъ,/ присно моли
Христа Бога нашего,/ даровати душам нашим велию
милость.

Преподобне отче Анатолие,/ чадо духовных
мудрый наставниче,/ ихже отеческою любовью
согревая,/ греховныя страсти искореняя еси/ и,
добродетельми сердца их укрепляя,/ воистинну
пастырь добрый явился еси./ Темже ныне, во
Царствии Небеснем ликовствуя,/ молися ко Христу
Богу нашему,/ даровати нам мир и велию милость.

Слава, глас тойже:

Вертоград скита Предтечева/ прозябе цвет
краснейший,/ добродетельми благоухающий,/
преподобнаго старца Анатолия,/ егоже, вернии,
благочестно почитаем,/ Господа нашего славяще и
радостно взывающе:/ о, мудрый наставниче и теплый
молитвенниче,/ Церкви Русския благое украшение,/
молися Пресвятей Троице вкупе со всеми старцы
Оптинскими/ спастися душам нашим.

И ныне, Богородичен: Владычице, приими
молитвы раб Твоих:

Славословие великое и отпуст.

На Литургии

служба вся преподобническая.

**Священный Синод на заседании 16-17 июля
2020 года (журнал № 34) утвердил к
общецерковному богослужебному употреблению
текст службы преподобному Анатолию
Оптинскому старшему]**

